

Schafkopf is des schönste Spiel

(Reggae 86bpm, Kartensounds, Geldklimpern)
[G- C] [Bm-D]

Intro

Strophe 1:

Geh setz Di mal her, I will dir zeign wie a gscheids Mannsbild heutzutag beim Kartln gwinnt
– hast damals nach der Grundschul zu mir gsogt.
Leider hob is ausgeschlagen, dei Angebot weil des Mofa und a E-Gitarren zu derer Zeit
oafach viel cooler warn als der Grünunter mit Flöten und der Max mitm Herzblatt.
Du musst die Augn und die Trümpf zählen, nachm Mischen immer abhebn und beim
Auszahln auf die Laufenden gut acht gebn, denn die Gauner wollen di abziehen
Und wenna zu schwer ist mit der Langa spuist mit der Kurzn oder Bierkopf bis die
Fingerkuppn abfault oder du gnua Kloageld host um

Refrain:

Schafkopf zu spuinn- in der Wärdshausstubn
Schafkopf zu spuinn- ja an
Schafkopf zu spuinn- bis die Sunn aufgeht
Schafkopf is des schönste Spiel
Schafkopf zu spuinn- mit der Oiden
Schafkopf zu spuinn- ja an
Schafkopf zu spuinn- mit der Hundsgvögelt
Schafkopf is des schönste Spiel

Strophe 2:

Dann warst jeden zweiten Tag beim Wirt oder am Stammtisch, bist am Wochenend vom
Schafkopfturnier mit der Bohrmaschine und oam Fassl Bier wie a Held zurückgekehrt.
Und wenna zum Piseln bist hob i neidisch aufn Herbert gschaut, der nie Lust ghobt hatt auf
sei Ärbert und als Brunskarter amoal gern die Rufsau zamm haut.
I hob mi nie traut zu frogn ob I aufhebn derf sondern ghofft dass Du immer gute Karten host
und die Trümpf auf deiner Händ zu oam gscheiten Solo glangt
Ja mei Herz hat zittert wie mei Knia, host an Wenz gspuit ohne Vier (Schuss) und nachm
letzten Stich bist auf und hast gschrien: 58-59-61

Refrain:

Schafkopf zu spuinn- reine Nervensach
Schafkopf zu spuinn- ja an
Schafkopf zu spuinn- is koa Glücksspiel
Schafkopf is des schönste Spiel
Schafkopf zu spuinn- Geier Wenz
Schafkopf zu spuinn- ja an
Schafkopf zu spuinn- drei Laufede
Schafkopf is des schönste Spiel

Solo aufm Fotzhobe

Strophe 3:

Heit geh i selber gern zum Kartln denk an Di und Deine Weisheit, an die Stunden auf der Eckbank mitm Rauch überm Biertisch wo I glernt hab was a Schneider oder Spritzn is. An der Wänd hängt des Bild vom Sie, wia Denkmal für an König und darunter stehn die Namen Deiner Freunde wie 4 Ober die nie Unter gehn.

Irgendwann sitzt dann aloa do, schaut zum Erich und zum Karlfried wie sie schnupfen und der Manfred stopft sei Pfeifn bis zum Anschlag, weil der Wirt um zwoa in der Früh koa Bier mehr hot.

Beim Blick in dei Geldschüssel denkst: wos moanst, soll i hoam, des langt und Du sogst wie der Schlot zu seiner besten Zeit: es is no net so weit, schenk an Schnaps ei: Der Oide gibt des letzt Spiel, weil an

Refrain:

Schafkopf zu spuin- bis mer hi san
Schafkopf zu spuin- ja an
Schafkopf zu spuin- oder im Himmel
Schafkopf is des schönste Spiel
Schafkopf zu spuin- a wennis Herz sticht
Schafkopf zu spuin- ja an
Schafkopf zu spuin- und i nimmer do bin
Schafkopf is des schönste Spiel

Schafkopf zu spuin- mit die Oiden
Schafkopf zu spuin- ja an
Schafkopf zu spuin- bis zum letzten Stich
Schafkopf is des schönste Spiel
Schafkopf zu spuin-...
Schafkopf zu spuin- ja an
Schafkopf zu spuin-
Schafkopf is des schönste Spiel